

Alles valoor?

De Mensch im Läwe vill riskiert,
wobei er monsches Mol valierd.
Bei de klääne Sache ohngefong,
aach Wärdsache so donn unn wonn.

Hadda valoor beim Kaadedresche,
musser de volle Innsatz blesche.
Unohngenehmer kann´s awwer werre,
will er sei Audodier uffschperre
unn suchd in alle Buxesäck
vageblisch – de Schlisselbund is weg.

Wenn´s jetzt beim Reddehalle noch passierd,
dasser de Faade gonz valierd,
wääß er sischer unn gewiss,
dass donn aach´s Manuschkript fort is.

Jetzt is sei Heizung aach noch kalt.
Er will se rebariere halt.
Awwer dodraus is nix wohr.
Sei Werkzeisch hadda aach valoor.

Wer is onn soviel Pesch nur schuld?
Hinn is allmählisch die Geduld.
Die Wuch neischd sisch em Enn jetzt zu,
zwei Daache Zeid, zwei Daache Ruh!
Unn donn, das nemmt er fescht sisch voor,
passder uff, donn geddem nix meh valoor.

Doch, das alles is jo ze ersetze, ze rebariere.
Nur drei Dinge , die solld ma nit valiere:
De Geburdsschein, de gudde Ruf unn de Humor.
Sunschd is omm Enn ma selwer valoor.

Helene Keller